

Date – 30/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Larsap Dr. Hari Babu Kambhampati a theih loh chhunga a ai lo awl lailawk tur Tripura larsap Indra Sena Reddy Nallu chu vawiin hian thutiam tira lakluh a ni ang.**
- 2. State chhungah vawiin hian Mim Kut hman a ni ang.**
- 3. Prime Minister Narendra Modi chuan Create In India beihpui thlak turah ramchhunga creator hrang hrangte chu tel turin a sawm.**
- 4. World Food Programme (WFP) chuan tunhnaia Israel leh Labanon-a Hezbollah firfiakte inbeihna avanga harsatna tawk mi maktauduai khat chuangte chhawmdawlina hmanhmawh a pe tan.**



MIZORAM GOVERNOR

Larsap Dr. Hari Babu Kambhampati a theih loh chhunga a ai lo awl lailawk tura ruat Tripura larsap Indra Sena Reddy Nallu chu vawiin hian thutiam tira lakluh a ni dawn.

Protocol & hospitality wing atanga thudawn danin Gauhati High Court Judge justice Nelson Sailo chuan Indra Sena Reddy Nallu hi Rak Bhavan-ah thutiam tirin vawiin chawhma dar 10 hian Mizoram larsap lailawk atan a lalut dawn a ni. Rashtrapati Bhavan atanga Press Communique hmanga hriatttirna Ningani a tihchhuahah President Pi Droupadi Murmu chuan Mizoram Larsap Dr Hari Babu Kambhampati-a'n chawlh a lak chhunga lo thawk lailawk turin Tripura Larsap ni lai a ruat a ni. Indra Sena Reddy Nallu hi nimin tlai khan Lengpui thlawhna tumhmunah a lo tum a, hetah hian chief minister Pu Lalduhoma leh minister dang thenkhat bakah chief secretary, DGP, Assam Rifles DIG leh official pawimawhte'n an lo hmuak a ni.

Larsap Dr Hari Babu Kambhampati chu a khawsik a reh hleih theih loh avangin September ni 7 khan Trinity Hospital-ah a lut a, a that theih mai loh avangin tun thla vek ni 9 khan Hyderabad-a Star Hospital ah dahluh a ni a. Doctor ten a hriselna dinhmun an enfiah hnuah chuap lamah harsatna a nei tih hmuhchhuah a ni a, tunah hian enkawl mek a la ni.



SHC POLLS

Sinlung Hills Council inthlan hun tur chu tunkar Ningani hian State Election Commissioner Pu H. Lalthlangliana'n a pisa-ah a puang dawn.

Pu H. Lalthlanglana hian Ningani chhun dar 12 khian chanchinbumite chu Sinlung Hills Council inthlan chungchangah a kawm duh thu hriattirna a chhuah tawh a. Hetah hian member 12 awmna Sinlung Hills Council inthlan hun tur hi a puang dawn niin Akashvani Aizawl chuan thu a dawng a. Inthlan hun hi November thla bul lam a nih rin a ni. Sinlung Hills Council inthlan hi a wawi hnihna tur niin a hmasa ber chu November ni 5, 2019 khan buatsaih a lo ni tawh a. Khami tum khan MNF 5, HPC 5 leh independent 2 an tling a. Tun term chhung hian thuneihna chelhtu executive council wawi 3 an insiksawi a, tunah hian HPC inthana a pakhat zawk leh ZPM tangrualin sorkarna an chelh mek a ni.

Sinlung Hills Council inthlanna lo awm tur atan hian electoral roll siamthar hna thawh mek a ni a, electoral roll duan thar tur atan September ni 10 khan electoral roll duan chhin tlangzarhin Thawhtanni hian final roll tihchhuah a ni ang. Sinlung Hills Council biak 12 zinga bial 6 hi Aizawl district chhunga awm a ni a, Saitual district chhungah bial 4 awmin Kolasib district-ah bial 2 a awm bawk.

Tun hma a Sinlung Hills Development Council tih thin kha April 2, 2018 a HPC (D) leh Mizoram sorkar inremna thuthlung zul zui-in Sinlung Hills Council ti a a hming thlakin thuneihna sang zawk pek a ni a. Hemi atan hian July ni 5, 2018 a pawm tak Sinlung Hills Council Act, 2018 hmangin Sinlung Hills Council hi din a ni ta a ni. Sinlung Hills Council-in a huam chin chu kum 1988-99 chho vela HPC-in district council an ngiat chin tlangpui kha a ni a. Sinlung Hills Council lo din dan a bul atanga chhui chuan district council hrang ngiatin HPC a lo ding a. Ralthuam hial an lek hnu-ah July ni 27, 1994 khan Aizwlah Mizoram sorkar nen inremna thuthlung an ziak ta a. August ni 27, 1997 khan Sinlung Hills Development Council a lo piang ta a. Mizoram sorkar leh HPC inremna a lungawi lo thenkhat chuan HPC (D) dinin ram an mu leh a kum 2018 a inremna siam a nih leh hnu-ah Sinlung Hills Council hi a lo piang leh ta ni.



RM CHAKMA

Mizoram larsap Hari Babu Kambhampati chuan eiruk thila MLA leh Chakma Autonomous District Council (CADC)-a CEM ni lai Pu Rasik Mohan Chakma puhna-ah court-a a thubuai kalpui phalna a pe.

District Council & Minority Affairs department secretary chuan Pu RM Chakma laka prosecution sanction phalna hi ni 20 khan larsap aiawhin a tichhuak a. He eiruk thubuai lo intanna hi Pu RM Chakma in bul, Kamalanagar-3 a tuihawk luankawr siam chungchangah a ni a. A chhuitute'n an chhui dan leh finfiahna an neihte uluk taka a zir chian hnu-ah larsap chuan Prevention of Corruption Act, 1988 section 19-na leh Cr.PC, 1973 section 197 tlawhchhanin prosecution sanction hi a pe ta a. Heti hian Pu RM Chakma hi Prevention of Corruption Act, 1988 section 13(1)(a) and 13(1)(b) leh Section 13(2) bakah Indian Penal Code section 409 leh 34-na tlawhchhanin court-a a chungthu rel a nih theihna atan a lakah chargesheet thehluh theih a ni dawn ta a. A lakah hian nikum July thla khan Anti Corruption Bureau (ACB) chuan thubuai ziak lutin an lo chhui tawh a ni.



MIM KUT

Vawiin hian Mizoram pumah Mim Kut hman a ni dawn a, a hmanna pui ber chu chawhma dar 11-ah Vanapa Hall-ah tan a ni ang.

Vanapa Hall-a kut hman tur hi Social Welfare, Tribal Affairs, Women & Child Development department buatsaih tur a ni a. He department changtu minister Pi Lalrinpui'n a hmanpui ang a, Central YMA, MUP leh MHIP hruaitute bakah MKHC hruaitute pawh an tel ang. Mizo Hnam lam leh zaite entira ngaihthlakna hun hman a ni dawn a ni. Aizawl khawpui chhunga Sawrkar hnathawkte chu Controlling Officer-te remtihna la hmasain Mim Kût hmanna a an tel Sawrkar chuan a phalsak a ni. Mim Kut hmanna pual hian Mizote hnam ziarang leh nunphungte entira a chawilar na'n Mizoram sawrkar hnuaia thawk zawng zawng leh State sawrkar hnuaia Public Sector Undertaking, Board, Body leh Agency hrang hrangte chu vawiin hian Office hun chhunga Mizo thuam inbel turin General Administration Department (GAD) chuan a ngen a ni.



TB

Kumin thla riat kalta (January leh August thla inkar) chhung khan Mizoramah ngawr natna avangin enkawl lai mek mi 95 an thi.

State tuberculosis programme hotute hnen atanga thu dawn danin hemi hun chhung hian ngawr natna vei a inringhlel mi 15,907 endik atangin mi 1,628 chuan ngawr natna an vei tih hmuhchhuah a ni a. An zingah hian TB natna damdawi a hun taka ei that loh avanga vei thin multi-drug resistance TB an tih mai mi 92 an awm thar a. Mi 95 in nunna an chan chungin ngawr natna vei damlo zinga za zela 80 chu tihdam an nih thu TB programme hotute chuan an sawi. HIV/AIDS vei lai tam takin an thih phah chu ngawr natna an kai tel hi a ni a. Ngawr natna vei zinga mi 176 hi HIV hri kai an ni tih hmuhchhuah a ni.

State TB Officer Dr. Febiola Kharkongor chuan sub centre a TB damdawi dah lailawk thin a mumal lohna chhan ber chu central atanga TB damdawi rawn thleng a khaihlak nasa vang a ni a ti a. Chu bakah sub centre ah damdawi dah thatna mumal a awm loh thu te, ngawr damdawi pangngai tak dah khawl thei tur chuan sub centre thuam that leh boruak lum leh vawh zawng dik tak hnuaiah dah a ngaih thu sawiin he ta tan hian sawrkar chuan hma a la chho dawn a ni a ti. TB umbo na kawnga hmalak mek na-ah hnathawhna hmuh hrang hrangah (work place) ngawr natna vei leh vei lo endikna kalpui a nih tur thu te, PHC leh CHC zawng zawngah TB endikna tha zawk TrueNAT awm thei tura hmalak a ngaih thute a tarlang a ni.



ENTITLEMENT

Mizoram sorkarin sorkar sum renchemna atana tih leh tih loh tur a kalpui mek zingah tunhma a an pisa a television set kawh thei official tam tak chu a phalsak tawh dawn lo.

Tun hnai a sorkar hriattirna chhuahin a sawi danin sorkar hnathawk zingah chief secretary tih loh chu an pisa a tv kawh phalsak an ni tawh lova.

Kawl phalsak thin - Principal secretary, commissioner, secretary, special secretary, additional secretary, joint secretary leh an tlukpuite chu kawll phalsak an ni tawh dawn lo. Hetih lai hian alo kawll tawh sate chu chhuhsak kher an ni dawn lova. Mahse, tun September thla atang hian thlatin a tv channel an pawhna man leh an tv chhia siamthatna man senso chu sorkarin a peksak tawh dawn lova, a kawltu officer-in a chawi a ngai tawh dawn a ni.



ASF UPDATE

African Swine Fever (ASF) vawk pulhri leng chuan zia-awm lam a pan chho zela vawk pulhri avang hian Inrinni khan Lunglei leh Hnahthial district-ah vawk 35 a thi a, niminah Serchhip leh Hnahthial district-ah vawk 46 a thi.

Animal husbandry and veterinary department hotute hnen atanga thudawn danin kumin January thla atanga tun thleng hian ASF avangin Mizoramah vawk 13,376 a thi tawh a. Tun dinhmunah khaw 243 chu ASF vawk pulhri lenna khua a puan mek a ni. Nimin khan Lunglei Serchhip leh Hnahthial district-ah vawk damlo 107 suat a ni a. Tun thlenga ASF hri darh zel tur venna atana vawk suat tawh zat chu 22,641 a tling tawh bawk a ni.



PM

Prime Minister Narendra Modi chuan Create In India beihpui thlak turah ramchhunga creator hrang hrangte chu tel turin a sawm. Nimina Akashvani-a Mann Ki Baat programme ah he thu hi sawiin Pu Modia chuan tunlai khawvelah hna leh remchanna thar awm mekah creative sector heng gaming, animation leh filmmaking lama thil siam chhuaktute chu a tam thei ang ber che chhuak turin a sawm a. Union Ministry of Information and Broadcasting-in a buatsaih tur Create in India 25 challenges ah tel ve ngei turin a sawm bawk a ni.



WFP

World Food Programme (WFP) chuan tunhnaia Israel leh Labanon-a Hezbollah firfiakte inbeihna avanga harsatna tawk mi maktauduai khat chuangte chhawmdawlina hmanhmawh a pe tan. WFP thuchhuah danin heng chhungkaw harsatna tawkte hnenah hian chaw ei mai theih tur chi hrang hrang an pe a. Ramchhung hmun hrang hranga chhawmdawlina ina khawsa te hnenah chaw leh chawmeh thahnem tak an sem mek a ni.

Karhmasa tawp lama inbeihna sosang leh avang khan rang takin chhawmdawlina hi pek a tul thu WFP chuan a sawi a. Chhungkaw tam takin an chenna hmun tlanchhiatsanin chhawmdawlina hmunah an khawsa lailawk mek a. Heng harsatna tawkte puihna tur hian WFP chuan dollar maktaduai 105 hmanhmawh takin an mamawh thu an sawi a. Khawvel ram hausate chu chhawmdawlina sum hi pe turin alo ngen tawh bawk a ni.

